

邕寧縣志卷十二

垠西莫炳奎星五編纂

職官志四

宦績列傳上

陶侃 呂仁 徐申 李翱 辛讜 侯仁寶 曹克明 陶弼 張立 徐噩 孫沔 孫節 賈達

李嶠 鄧某 李位 鄭愚 范旻 魏瓘 馮仲己 孔宗旦 張拱 余靖 狄青 張日新 劉几

張玉

劉初

和斌

陸誥

蘇緘子明子正
孫廣淵直溫

謝季成

梁順孫

鄧孝廉

蔣允濟

崔與之

范寥

顏敏德

沈世顯

張次离

董槐

馬墜

臧夢解

宋士堯

楊文廣

李師中

劉誼

唐子正

譚必

李拱

王佐

李守柔

李浩

陳琦

吳傲

林干

唐容

黃鼐

烏古孫澤

封履孫

(晉)

陶侃，字士行。本鄱陽人也。吳平。徙家廬江之潯陽。忤王敦。左遷廣州刺史。晉書陶侃傳 太興元年

侃爲刺史。分漢領方縣地。置晉興郡。領縣八。曰晉興、曰熙注、曰桂林、曰增翊、曰

安廣、曰廣鬱、曰晉城、曰鬱陽、貢賦由是日盛。有陶侃碑。太平寰宇記引南越志

案前志名宦。若前伏波路博德之開置鬱林。漢書武帝本紀及衛青傳 後伏波馬援之約束駱越。後書書本傳 鬱林

太守。則谷永之恩信。粵西文載引後漢書西南夷傳 陸績之儒雅。三國志本傳 毛昺之忠義。晉書陶璜傳 皆以統部官特

著聲績。載在正史。疇昔通志府志。以統部官列之名宦。於史裁自無不合。縣志則非

其倫。蓋地有分域。而官乃有分職。今縣既建於晉之陶侃。則傳宦績者。亦一以侃爲斷

。蓋春秋託始之義云爾。

（唐）

李嶠。字巨山。趙州贊皇人。監察御史。時嶺南邊巖二州首領反叛。發兵討擊。高宗令嶠往

監軍事。嶠乃宣朝旨。特赦其罪。親入獠峒。以招諭之。叛者盡降。遂罷兵而還。舊唐書李嶠傳

呂仁、景雲中邕州司馬。鬱水自蠻境入邕。民常苦之。仁引渠分流。以殺水勢。自是無沒溺

之害。民乃得夾水而居。唐書地理志 左右江諸羈縻州。初未朝貢。亦無城隍。先天二年。仁奏

遣副使韋道楨、滕崇、黃居左等。巡諭勸築。應時修舉。輸貢恐後。左右江道四十一州。

悉隸邕府。太平寰宇記案呂仁原作呂仁高今從唐書作呂仁

鄧某、南陽人。邕州經略史路恕。奏署試大理評事。兼貴州刺史。參帷幕之任。董龜虎之威

民俗敬愛。革面受事。朝廷將以武定南服。命安南大校御史中丞趙良金。爲邕州節度招討使。以復兼招討判官。錄其異能。奏加司直。升招討副史。兼統橫廉貴三州事。賦增而不擾。法一而無憾。卒於官。粵西文載

徐申、字維降、京兆人。由景州刺史。遷邕管經畧史。管內自黃峒蠻亂。經畧史路恕、韋悅、連破之。蠻仍不戢。非時剽鈔。申至。黃峒納質貢賦。不敢桀驁。時黃氏、儂氏、韋氏、周氏。並爲首領。而儂黃最強。申厚撫之。咸聽約束。府志。按唐書有傳。今從府志

李位、文皇帝元孫。知泉州。元和中。烏滸夷刺殺郡史。毆縛農民。詔以位都督邕州。兼御史中丞。賜紫金魚袋。爲經畧招討使。既至。則弢弓橐中。去斥堠。禁部內無敢以賊名。使得自澣濯。諸酋長咸頓首。送款輸稅奉貢。願比內郡。柳河東集

李翱、字習之。涼武昭王之後。太和五年。出爲桂州刺史御史中丞。充桂管都防禦使。舊唐書李翱傳

又爲邕州刺史。大首領黃氏。帥其屬納質供賦。黃氏、儂氏。皆羣盜也。韋氏不附。率羣黃之兵以攻之。而逐諸海。羣盜皆伏。於是十三部二十九州悉平。粵西文載

鄭愚、番禺人。萬姓統譜作清何人咸通初。桂管觀察使。廉察吏弊。闔境肅然。三年。嶺南西道節度使

蔡京。苛慘淫刑。爲邕州軍事所逐。詔以愚代之。瘡痍嗷嗷。方撫循不暇。會南詔人寇。安南都護蔡襲告急。勅發荆南湖南兩道兵二千。桂管義征子弟三千。詣邕州。受愚節度。而嶺南東道。奏蠻兵必向邕州。宜先保護。未可馳赴。勅愚分兵備禦。時所發諸道兵。竟不進。襲又奏求益兵。愚支扞半載。邕州得無虞。朝廷復督責之。愚乃自言儒臣無將略。

請任武臣。於是詔武義節度使康承訓代之。承訓上言。愚在鎮善守禦狀。朝廷始知愚之功。

詔爲禮部侍郎。

粵西文載

辛讜。蘭州金城人。乾符中。爲嶺南西道節度使。自宣宗以來。南詔寇邊。中國爲之虛耗。至是其君驃信。遣使來請和。讜奏以爲諸道兵戍邕州。久饋餉疲敝。請許其和。使羸瘵息肩。詔許之。讜先後遣使至南詔。相繼道卒。復慰諭攝巡官徐雲虔至善闡。見驃信諭之曰。順祖考、孝也。事大國、義也。息戰征、仁也。審名分、禮也。四者皆令德也。可不勉乎。驃信從之。待雲虔甚厚。留十七日而還。自是蠻不爲寇。讜既和南詔。以管內儂峒、黃峒、素結南詔。復招撫其酋儂金勒等。與之通歡。持牛酒音樂賚之。並遣其母衣服。母賢者。誚讓其子。金勒感悟。始罷兵。邕遂成樂土。

金鉞通志

按兩唐書辛讜並有傳。今從金鉞通志。又徐雲虔歸著南詔錄二卷。上卷言山川風俗。下卷記行及使事。見文獻通考及玉海。

(宋)

范旻、字貴參、大名宗城人。嶺南平。知邕州。兼水陸轉運使。

(李濂長編)開寶四年十月。知邕州范旻、奏劉鋹時、白配民物、十數

事、悉命除之、

俗好淫祀。輕醫藥。重鬼神。旻下令禁之。且割己俸。市藥以給病者。愈者千計。

復以方書刻石。置廳壁。民感化之。會南漢知廣州官鄧存忠。劫土人二萬衆攻州城。七十餘日。旻屢出親戰。矢集於胸。猶激勵將卒。殊死戰。賊遂少却。病創日篤。堅壁固守。遣使十五輩。求援廣州。救兵至圍解。賜璽書獎之。旻病甚。詔令有司以肩輿載歸闕下。

病愈。通判鎮州。著有邕管記三卷。

宋史范質傳

侯仁寶、汾州平遙人。太宗時。以蔭遷太子中允。即趙普妹婿。盧多遜與普有隙。普罷相。即以仁寶知邕州。州之右江。生毒藥樹。宣化縣人。常采貨之。仁寶以聞。詔盡伐去。九年不代。太平興國中。上言陳取交州之策。遂以仁寶爲交州水陸計度轉運使。前軍發。遇賊鋒甚盛。援兵不繼。遇害死江中。特贈工部侍郎。錄其子。宋史侯益傳

魏瓘、字用之。歙婺源人。提點廣南西路刑獄。邕州獠戶。緣逋負。沒婦女爲傭者千餘人。

悉奏還其家。就除轉運使。

宋史魏瓘傳

曹克明、字堯卿、雅州百丈人。景德中知邕州。左右江蠻洞三十六。克明召其酋長。諭以恩信。是歲承天節。相率來集。克明慰拊。出衣服遺之。感泣而去。獨如洪洞恃險不至。克明諭兩江防遏使黃衆盈。引兵攻之。斬其首領陸木前。梟於市。宜州澄海軍校陳進反時。鬱江暴漲。州城摧圮。克明率丁夫伐木爲連舫。維之水上。狀如郭郭。又多旗幟。浮巨筏。陳兵其上。爲守禦備。募溪峒兵三千。而黃衆盈亦濟兵千五百。將趣象州。會安撫使曹利用。約克明會兵。行次貴州遇賊。大敗之。斬首四百餘級。賊平代還。撫水蠻叛。爲宜融桂昭柳象邕欽廉白十州都巡檢使。兼安撫使。撫定之。代還。知滁州。徙鼎州。會交趾李公蘊寇邕州。以文思使復知邕州。既至。遣人入交趾。諭以利害。公蘊拜表謝罪。遷西上閣門使。歷知登舒邵三州。宋史曹克明傳

馮伸己、字齊賢、河陽人。天聖中。知邕州。治舍有井。相傳不敢飲。飲輒死。伸己乃汲以自供。終無恙。旁城數里。有金花木。土俗言花開即瘴起。人不敢近。伸己故以花盛時。

酣燕其下。亦復無害。尋知桂州。兼廣西鈐轄。遷宜州。平安化蠻。以勞進西上閣門使。

遷果州團練使。

宋史馮拯傳

陶弼、字商翁。永州人。慶歷中。陽朔主簿。時儂智高犯南海。楊畋爲安撫使。辟參軍。謀使下英江。會諸將議擊。未至。智高解去。弼舍舟。從其徙數十人。間關涉出赴畋。次臨賀。大將蔣偕適戰死。餘衆畏亡。將被誅。多降賊。弼數與之遇。亟矯畋命。揭榜道上。諭使歸。許以不死。凡得千五百人。事罷。調陽朔令。課民植木官道旁。夾數白里。自是行者無夏秋暑暍之苦。他郡縣悉效之。攝興安令。移書說桂守蕭固。浚靈渠以通漕。不聽。至李師中卒浚之。師征安南。餽餉於是乎出。大爲民利。知邕州。邕經儂寇。井遂蕩然。人不樂其生。弼綏輯惠養。至忘其勤。諸峒獻土物。求內附。弼降意撫答。謝其贄。皆感悅無犯邊者。邕地卑下。水易集。夏大雨彌月。弼強登城以望三邊。皆漫爲陂澤。亟窒垠江三門。諭兵民。即高避害。俄而水大至。弼身先版鐮。召僚吏賦役。爲土囊千餘置道上。水果從竇入。隨塞之。城雖不壞。而人皆乏食。則爲發廩以振於內。方舟以饋於外。水不及女牆者三版。旬有五日乃退。公私一無所失。自橫潯以東數州皆沒。弼久於邕。請便郡徙鼎州。郭逵南征。轉弼康州團練使。復知邕州。民再罹禍亂。散匿山谷。弼率百騎深入。左江峒民知其至。扶老攜幼以歸。逵帥官軍臨富良江。使弼殿。交人納款。逵欲班師。恐爲所襲。乃以計夜起。軍不整。騎步相踏藉亂行。賊隔江陰伺。覘知弼殿。弗敢追。弼中令帳下毋動。遲明。結隊徐行。逵賴以善還。建所得廣源峒爲順州。桄榔爲縣。進弼西上閣門使。留知順州。州去邕二千里。多毒草瘴霧。戍卒死者什七八。弼亦疾甚。然蚤暮勞軍。視其良苦。意氣激揚。士莫不感泣。彊奮起爲用。交人襲取桄榔。揚聲欲

圖州。獨難弼素得人心。賊動息皆先知。獲間諜不殺。諭以逆順。縱之去。恩威兩施。以是終弼在。不敢犯。加東上閣門使未拜而卒。詔錄其家五人。弼能爲詩。好士樂施。所得俸祿。悉以與人。家至貧不恤也。既死。妻在鄉里。僦屋以居。宋史陶弼傳有商翁集。邕州小

集。四庫全書提要

孔宗旦、魯人。爲州司戶參軍。儂智高未反時。州有白氣出中庭。江水溢。宗旦以爲兵象。度儂智高必反。以書告知州陳珙。珙不聽。後智高破橫山。即載其親往桂州曰。吾有官守。不得去。無爲俱死也。既而州破被執。賊欲任以事。宗旦叱賊。且大罵。遂被害。事聞

。贈太子中允。宋史孔宗旦傳

張立、廣西都監。皇祐中。儂賊陷十二郡。據邕州。驅立等殲焉。立臨刑。辭色不變。時邕州陳珙亦被執。呼智高萬歲。乞哀求自效。不聽。竟殺之。粵西文載

張拱、爲廣西都監。儂賊圍邕州。自賓州引兵來援。既入而城陷。拱罵賊不屈死。踰月得其屍如生。同上

徐噩、字伯殊。其先洪州人。五世祖申。唐元和中爲邕管經略使。遂家白州。金鉞通志仁宗朝鄉

舉。攝宜州。討區希範有功。授白州長史。皇祐中。儂智高叛。噩引兵追至亟陽。大捷。

歷戰於金城驛。援兵不至而死。贈大理寺丞。清統一志

余靖、字安道、韶州曲江人。知虔州。丁父憂去。儂智高反邕州。乘勝掠九邪。以兵圍廣州。朝廷方顧南事。就喪次起靖知潭州。改桂州。詔以廣西南路。委靖經制。智高西走邕州

靖策其必援交趾。而脅諸峒以自固。乃約李德政。會兵擊賊於邕州。備萬人糧以待之。而詔亦給緡錢二萬。助德政興師。且約賊平。更賞以緡錢二萬。又募儂黃諸姓酋長。皆縻以職。使不與智高合。既而朝廷遣狄青孫沔、將兵共討賊。青卻交趾援兵不用。賊平。就遷靖給事中。御史梁蒨言賞薄。又遷尚書工部侍郎。初青未至前。戒部將勿戰。靖迫鈴轄陳曙出鬪敗走。青至按軍法斬曙。及指使袁用于坐。靖瞿然起拜。又諸將班師。獨留靖廣西。遣人人特磨道。擒高智母子弟三人。生致之闕下。加集賢院學士。徙知潭州。又徙青州。交趾蠻申紹泰寇邕州。殺五巡檢。以靖安撫廣西。至即召交趾用事臣費嘉祐。詰問之。嘉祐主。給執近邊種落相侵報。誤犯官軍。願悉推治還所掠。及械罪人以自贖。靖信之。厚謝遣去。嘉祐遂歸不復出。知廣州。宋史余青傳

孫沔、字元規。越州會稽人。知秦州。時儂智高反。沔入見。帝以秦事勉之。對曰。臣雖老。然秦州不足煩聖慮。陛下當以嶺南爲憂也。臣觀賊勢方張。官軍朝夕當有敗奏。明日聞蔣偕死。帝諭執政曰。南事誠如沔所料。宰相龐藉奏遣沔行。以爲湖南江西路安撫使。以便宜從事。加廣南東西路安撫使。沔請益發騎兵。且增選偏裨二十八人。求武庫精甲五千。參知政事梁適折之曰。毋張皇。沔曰。前日爲亡備故。至此。今指期滅賊。非可以徼倖勝。乃欲示鎮靜邪。夫實備不至。而貌爲鎮靜。危亡之道也。居二日促行。才與兵七百。沔憂賊度嶺而北。乃檄湖南北曰。大兵且至。其繕治營壘。多具宴犒。賊疑不敢北侵。會遣狄青爲宣撫使。沔與青會。青與智高遇戰歸仁舖。智高敗走。青還。沔留治後事。遷給事中。及還。帝問勞。解御帶賜之。宋史孫沔傳

狄青、字漢臣。汾州西河人。皇祐中。廣源州蠻儂智高反。陷邕州。又破沿江九州。圍廣州

。嶺外騷動。楊旼等。安撫經制蠻事。師久無功。又命孫沔、余靖、爲安撫使。

討賊。仁宗猶以爲憂。青上表請行。翼日入對。自言臣起行伍。非戰伐無以報國。願得蕃落騎數百。益以禁兵。羈賊首致闕下。帝壯其言。遂除宣徽南院使。宣撫荊湖南北路。經制廣南盜賊事。置酒垂拱殿以遣之。時智高還據邕州。青合孫沔、余靖、兵次賓州。先是蔣偕、張忠、皆輕敵敗死。軍聲大沮。青戒諸將。毋妄與賊鬪。聽吾所爲。廣西鈐轄陳曙。乘青未至。輒以步卒八千犯賊。潰於崑崙關。殿直袁用等皆遁。青曰。令之不齊。兵所以敗。晨會諸對堂上揖曙起。并召用等三十人。按以敗亡狀。驅出軍門斬之。沔靖相顧暗貽。諸將股栗。已而頓甲。令軍中休十日。覘者還以爲軍未即進。青明日。乃整軍騎。晝夜絕崑崙關。出歸仁鋪爲陣。賊旣失險。悉出逆戰。前鋒孫節搏賊。死山下。賊氣銳甚。沔等懼失色。青執白旗麾騎兵。從左右翼出。賊不意。大敗之。追奔五十里。斬首數千級。其黨黃師宓、儂建中、智中、及偽官屬死者五十七人。生擒賊五百餘人。智高夜縱火燒城遁去。青按兵入城。獲金帛鉅萬。雜蓄數千。招復老壯七千二百。嘗爲賊所俘脅者。慰遣之。梟黃師宓等邕州城下。斂屍築京觀於城北隅。時賊屍有衣金龍衣者。衆謂智高已死。欲以上聞。青曰。安知非詐邪。寧失智高。不敢誣朝廷以貪功也。還至京師。帝嘉其功。拜

樞密使。

宋史狄青傳

孫節、開封人。西京左藏庫副使。狄青討智高。辟隸麾下。至歸仁驛。節爲前鋒。直前搏戰。賊銳甚。節鏖戰山下。俄中鎗而沒。特贈忠武軍節度使留後。

宋史孫節傳

張日新、安仁人。爲廣西邕州都監。皇祐四年。儂智高率衆沿鬱江東下。破橫山寨。日新

力戰不支。被執。

江西通志

與都巡檢高士安、吳香、俱不屈死。

續通鑑

賈逵、真定藁城人。殿前班副使。從狄青征儂智高。戰於歸仁驛。既陳。青誓衆曰。不待令而舉者斬。時左將孫節戰死。逵爲右將軍先鋒。將私念所部兵數。困易峒。兵法。先據高者勝。苟復待命。而賊乘勝先登。吾事去矣。即日引軍趨山。既定。賊至。逵麾衆馳下。仗劍大呼。斷賊爲二。首尾不相救。遂潰。逵詣青請罪。青拊其背謝勞之。邕州城空。青使逵人。括公私遺墜固辭。是時將校多以搜城故。匿竊金寶。獨逵無所犯。

宋史賈逵傳。按逵所趨山今

爲縣東三塘驛烽火臺俗所稱烟墩者是也

劉几。字伯壽。洛陽人。儂智高犯嶺南。几上書願自效。以爲廣東西捉殺道。聞蔣偕、張忠、戰

沒。疾驅至長沙。見狄青曰。賊若退守巢穴。瘴毒方興。當班師以俟再舉。若恃勝求戰。

此成擒耳。賊果悉衆來。大戰於歸仁鋪。前鋒孫節死。几以右軍搏鬥。自辰至己。勝負未

決。几言於青。出勁騎五千。張左右翼。擣其中堅。賊駭潰進皇城使。

宋史劉温叟傳

張玉。字寶臣。保定人。以六班散值。隸狄青麾下。從征儂智高。抵歸仁驛。賊列三銳陣以

逆官軍。軍小卻。玉率右廂突騎。橫貫賊壘。賊大潰。帝召見。使作銳陣於殿廷下。觀破

賊之勢。擢爲廣西鈐轄。累遷昭州防禦使。宋史張玉傳

宋士堯、馬平人。都巡檢使。嘉祐五年七月。交趾與甲峒蠻。合兵寇邕。士堯率兵至邕與戰。

爲所敗。賊斷其首。屍猶不仆。馳馬而還。賊驚異。不敢逼。贈屯衛大將軍。

府志引宋史仁宗紀

劉初、皇祐間。知邕州。於儂賊平後。築城防守。隨築隨潰。初苦思累日。莫能就。晨起

。一見巨蛇。繞行於地。初見之。大喜曰。得之矣。遂依蛇迹而築城。乃成。即今郡城也。府志

楊文廣、太原人。狄青南征。爲廣西鈐轄。知邕州。撫馭有方。士卒樂爲效死。時以名將稱

。粵西文載。按宋史附楊業傳今從文載

和斌、字勝之、濮州鄆城人。狄青南征。使部騎兵爲前鋒。青駐賓州十日怠寇。既乃倍道兼行。斌以兵疲於險。利在速戰。即日度關。鏖戰歸仁舖。孫節死。斌引騎血戰。繞出賊後。遂敗之。師還。張破賊陣形於殿廷。仁宗拊勞。擢文思副使。權廣西鈐轄。累歲。徙涇原。安南入寇。復徙廣西。累遷皇城使。昭州刺史。元豐間。由宜州移知邕州。以老請還。

宋史和斌傳

李師中、字誠之、楚邱人。提點廣西刑獄。邕管有馬軍五百。馬不能夏多死。師中謂地皆險阻。無所事騎。奏罷之。初邕州蕭注。宜州張師正。謀啟邊釁。注欲以所管蠻峒酋豪。往討交趾。云不用朝廷兵食。詔下經畧使蕭固。轉運宋咸。二人爲注所餌。合詞稱便。而師中至。詔以注奏付之。師中邀注來難之曰。君以酋豪伐交趾。能保必勝乎。日不能。師中曰。既不能保必勝。脫有敗衄奈何。注知不可。遂罷議。會蠻獠申紹泰、入追亡者。害巡檢宋士堯。注又張皇爲駭奏。仁宗爲之旰食。師中言無足憂。因劾注邀功生事。掎斂失衆心。卒致將率敗覆。按法當斬。於是注責泰州安置。並按固咸皆坐貶。師中攝帥事。交趾耀兵於邊。聲言將入寇。師中方宴。飲酒自若。草六榜揭境上。披以其情。賊不敢動。即日貢物。紹泰懼。委巢穴遁去。儂智高子宗旦。保火峒。衆無所屬。前將規討以幸賞。

遂固守。師中檄諭禍福。立率其族以地降。邊人化其德。多畫像立祠以祀。稱爲桂州李大
夫。不敢名。宋史李師中傳

陸誥、字介大、餘杭人。知桂州。湊言邕去桂十八驛。異時經畧使未嘗行。飭武備。臣願得一往。使羣蠻知省大將號令。因以聲振南交。詔可之。自儂徭定後。交人寢驕。守帥嘗姑息。誥全部。其使者黎順宗來。偃蹇如故態。誥誥其禮。召問折論。導以所當爲。懾伏而去。誥遂至邕州。集左右江四十五峒酋詣麾下。簡閱土丁五萬。補置將吏。更鑄印給之。軍聲益張。交人滋益恭。使入貢。召爲天章閣待制。知諫院。命張由代之。英宗戒以毋得改誥法。宋史陸誥傳

劉誼 字宜父、長興人。宋治平四年進士。元豐元年。勾管廣南西路。常平二年。奏言邕州官舍民居。悉以茅覆。且兵燹之後。邊城樓櫓未備。乞集陶人燒瓦。運宜州木版。洞溪竹蓋。公私屋宇。以絕火患。從之。民居以安。廣西金石畧吳興志及通鑑長編

蘇緘、字宣甫、泉州晉江人。熙寧初。如京使廣東鈐轄。四年。交趾謀入寇。以緘爲皇城使。知邕州。緘伺得實。以書抵知桂州沈起。起不以爲意。及劉彝代起。緘致書於彝。請罷所行事。彝不聽。反移文責緘沮議。令勿得輒言。八年。蠻遂人寇。衆號八萬。陷欽廉。破邕四砦。緘聞其至。閱州兵得二千八百。召僚吏。與郡之人材者。授以方略。勒部隊。使分地自守。民驚震四出。緘悉出軍帑及私藏示之曰。吾兵械既具。蓄聚不乏。今賊已薄城。宜固守以遲外援。若一人舉足。則羣心搖矣。幸聽吾言。敢越佚。則孥戮汝。有大校翟績潛出。斬以徇。由是上下脅息。緘子子元。爲桂州司戶。因公事攜妻子來省。欲還而

寇至。緘念人不可戶曉。必以郡守家出城。乃獨遣子元。留其妻子。選勇士拏舟逆戰。斬蠻酋二。邕既受圍。緘晝夜行勞士卒。發神臂弓射賊。所殪甚衆。緘初求救於劉彝。彝遣將張守節救之。逗留不進。緘又以蠟書告急於提點刑獄宋球。球得書驚泣。督守節。守節皇恐。遽移屯火夾嶺。回保崑崙關。猝遇賊。不及陣。舉軍皆覆。蠻獲北軍。知其善攻城。啗以利。使爲雲梯。又爲攻濠洞。蒙以華布。緘悉焚之。蠻計已窮。將引去。而知外援不至。或教賊囊土傳城者。頃刻高數丈。蟻附而登。城遂陷。緘猶領傷卒馳騎。戰愈厲。而力不敵。乃曰。吾義不死賊手。亟還州治。殺其家三十六人。藏於坎。縱火自焚。蠻至求尸皆不得。屠郡民五萬餘人。率百人爲一積。凡五百八十餘積。隕三州城以填江。邕被圍四十二日。糧盡泉涸。人吸漚麻水以濟渴。多病下痢。相枕籍以死。然訖無一叛者。緘憤沈起、劉彝、致寇。又不救患。欲上疏論之。屬道梗不通。乃榜其罪於市。冀朝廷得聞焉。神宗聞緘死。嗟悼。贈奉國軍節度使。謚曰忠勇。賜都城甲第五。鄉里上田十頃。聽其家自擇。以子元爲西頭供奉官。閣門祇候。召對。謂曰。邕管賴卿父守禦。儻如欽廉即破。則賊乘勝奔突。桂象皆不得保矣。昔張巡許遠。以睢陽蔽遮江淮。較之卿父。不能過也。改授殿中丞。通判邕州。次子子明、子正、孫廣淵、直溫、與緘同死。皆褒贈焉。起與彝。皆坐謫官。緘沒後。交人謀寇桂州。行數舍。其衆見大兵從北來。呼曰。蘇城隍領兵來報怨。懼而引歸。邕人爲緘立祠。元祐中。賜額懷忠。宋史蘇緘傳

唐子正、字幾卿、桂州興安人。治平初。舉孝廉。後通判邕州。熙寧八年冬。交趾圍邕州。與蘇緘固守。外援不至。

清一統志

交賊陷城。力戰遇害於州治橫壁亭。贈司農少卿。

靈州歐陽闢唐少卿遇仙記。

案記刻臨桂劉仙巖又光緒江西通志列傳、以子正爲廣信府興安人、大謬、廣信之興安、嘉靖間始分弋陽立縣、與宋桂州文興安無涉、

謝季成、字子立、晉江人。以蔭爲大理評事。熙寧中。知邕州廣西鈐轄。峒蠻侵叛。悉討平之。築城浚隍。備禦之具。爲一路最。邕筦外寨。戍兵歲物。故常千餘。季成請以峒丁代戍。而教之。不失備。且可救死亡。民以爲便。元祐中。卒於官。邕人廟祀之。號清戍將

軍。萬姓統譜

譚必、字子思、樂昌人

案文載作江西人大誤今從廣東通志改正

登進士第。元祐間。爲邕州推官。攝郡事。會交人復

寇邕。必輯兵抗禦。力戰不克。交人執之。欲誘以利。堅不可奪。自經死。

粵西文載

累贈金紫

光祿大夫。諡忠愍。

廣東通志

梁順孫、字景樞。高要人。宣和間。以桂州監察判官。監邕州橫州田州諸峒金坑。往時監官

多所需索。峒丁苦之。叛服靡常。爲朝廷患。順孫撫諸峒以恩信。不較金。諸蠻長聽服。民

歸者如市。州人德之。稱梁父母。

金鉞通志

先是儂寇擄掠平民入峒。數十年無一人還者。順孫

故有威信。諸峒首領所畏服。身請使歸其人。難民得歸者甚衆。順孫死。護送者數百里。

事聞。官其一子。

萬姓統譜

卒琪、字溫之、永福人。尙氣節。徽宗末。拜邕州團練使。金人犯京。以蠟九書召天下兵。

琪聞之。集僚佐曰。主憂臣辱。主辱臣死。豈可以道遠自營乎。募死士三千人。屬通判蔣

炳文與俱。炳文托爲桂帥所留。琪獨引兵進。北至衡州。賊將擁數萬衆扼其前。旁郡皆閉

城自守。或勸琪宜退。琪不從。竟戰死。事聞。詔旌其門曰忠義

金鉞通志

鄧孝廉、字清臣、曲江人。建炎間。倅邕攝郡事。邕歲市馬界上。吏多侵盜。馬不時至。孝廉盡革其弊。歲饑。發廩賑之。不足。繼以俸金。全活甚衆。粵西文載

王佐、字用之、全州人。數預鄉薦。晚始就官。仕至邕州戶曹。嘗攝獄事平反冤死罪者七人。他日攜厚齎來餉。力却之。受一小佩刀。路允迪志其墓。稱其伸入之冤。謝人之餉。

與史稱百紙參軍。一錢太守無異。同上

蔣允濟、興安人。紹興二年。與兄允升同登第。仕邵州斬化縣。縣素號難治。允濟抵官。即相為要約。積年不輸之租。車牛係道。未幾。丁內艱。邑人相牽遮部使者。願奪其喪。後為賓倅。攝昭州。舊官出錢二百。予民輸布一疋。復折布為錢十倍之。允濟疏以聞。竟減其半。尋知潯州。課居最。及守邕管。盡蠲買馬弊。百貨無所問。民服其廉介。至不敢相讐殺。死之日。哭者罷市。嘗按平南巡檢祝尙賢。奪一官。及喪過。尙賢哭甚哀、或問之。曰。曩我實犯罪。非公之私。公賢。安得不哭。凡歷州縣。恩信結民。政不苛迫。沒而人思之。子礪。亦以廉明稱。通判邕州。張孝祥誌其墓。粵西文載

李守柔、字必強、臨桂人。紹興間進士。嘗倅邕守。時武臣御下嚴。衣糧不時給。將大閱。衆洶洶不靖。守柔勸使移病為攝州事。下令發帑。廩給諸將。引首亂者斬之。軍中肅然。

金鉞通志

崔與之。字正子。廣州人。嘉定中通判邕州守。武人苛刻。衣賜不時給。諸卒大闕。漕司檄與之攝守。叛者帖然。乃訪其首事者一人斬之。闔郡以寧。擢發遣賓州軍事。郡政清簡。

尋特授廣西提點刑獄。宋史崔與之傳

李浩。字德遠。臨川人。乾道初。以直寶文閣知靜江。兼廣西安撫。有尙書郎入對。論及擇帥事。上曰。如廣西朕已得李浩矣。邕管所隸安平州。其酋恃險聚兵爲邊患。浩遣單使。

諭以禍福。且許其引赦自新。即日叩頭謝過。焚撤水柵。聽大府約束。治廣二年召還。

宋史李浩傳

范寥。字信中。家丹陽。嘗知邕州。兼邕管安撫。邊境寧謐。輒以詩酒自娛。呂本中、韓駒

、皆與之唱和。

京口耆舊傳

陳琦。字擇之。號克齋。臨江人。乾道進士。從張栻遊。栻帥桂。招入幕。邕州歲市大理馬。馬來已二千里。傳致諸軍又數千里。多道死。琦提舉市馬。令修園而飼之。瘠者止。良者行。後者至。先者發。自是馬無耗者。

江西通志

顏敏德。字克和。海澄人。登乾道乙丑第。除邕州安撫使。邕屢有峒寇。敏德諭以威信。不

敢犯。所部救寧。朝命嘉之。官至朝散大夫。

海澄縣志

吳儼。字益恭。休寧商人。登紹興二十七年進士。淳熙元年。通判邕州。時張栻經畧嶺右。疑事悉以咨之。儼曲爲籌畫。畢就條理。郡闕守。檄攝郡事。自杞蠻勇悍善鬥。歲卒數千人。至橫山市馬。恃強驕橫。至不書正朔。其酋必程持國書來爭論。州人大恐。儼嚴兵庭見之。酋驕甚。儼責之曰。汝本小小部落。賴朝廷許汝市馬。歲得銀帛二十餘萬。今三十年矣。汝國因以富強。役屬諸蠻。奈何忘朝廷厚恩耶。汝敢不用正朔。觸及廟諱。妄有要求。吾當聞諸朝。絕汝馬市。其無悔。酋乃屈服。下閉洞酋凌謐。歲掠良民。市于他洞。人易金一兩。能操技藝者倍之。每歲購馬。遣丁夫治驛道。輒爲所掠。儼遣人追問。謐不悛。以兵擒之歸。梟其首市上。遠近稱快。安平州酋李械。匿逋爲奸利。久不奉帥憲命

。州有虞兵二逸械所。太書尺紙示械。棧惶懼。果遣之歸。且以書幣請罪。乃責而釋之。返其幣。械歎曰。公清冰。非往時太守比。吾敢慢乎。由是兩江五十餘洞。皆相戒懾服。無違命者。且曰。吾寧貧窮。無犯吳公。留邕三年。治績稱最。張栻露章薦于朝。名赴闕。去之日。邕之吏士兵民數千人。遮道請留。常時宗工鉅卿。張栻外。知朱晦庵。呂東萊。陳龍川。陸梭山。范石湖。陳止齋等。皆與友善。倅邕州時。栻以書告晦庵曰。吳益恭忠義果斷。緩急可仗。今世未見其匹。及歸自邕而得對也。栻書孔子之剛。曾子之勇。南方之強三章以諗別。陛對。孝宗嘉獎。欲除儆御史。適邕又闕守。上以馬政為憂。復以邕管屬之。以親老辭。遂請祠。著有竹洲集三十卷。朱子曰。往見張荊州呂著作。皆稱吳邕州之才。今讀其文。又有以見其所存矣。據南宋文錄及竹洲榮

沈世顯、征光祖、廬陵人。嘉泰中。以東南第十副將。陞東南第十將。駐於邕管。先是買馬捕峒寇有勞。時峒長黃燦。坐法繫獄。朝家督馬方急。無應之者。郡將良寤。僚佐共議。君曰。使功不如使過。燦誠有罪。而蠻人之所信。宥而遣之。必感恩盡方。從之。未旬日。事果辦。嘉定六年卒。其在邕也。士大夫之家。有落拓不能歸者。為教其子。而助其孀幼。道里費。還之故鄉。子師臯。亦監邕州都作院。袁燮繫齋集

林干、嘉定中。為邕州監官。郡守斂金以媚宰相。干以媚竈之意責之。後以罪誣罷去。人甚冤之。粵西文載

張次離、字寬夫。浦城人。知邕州。歷講馬政。會徼外蠻蛋交爭。次離視事三日。即單騎渡江。面慰撫之。於是盡得良馬。蠻俗亦安。以疾丐祠卒。萬姓統譜

唐容、零陵人。舉進士。宰豐城。政績爲諸邑最。尋知邕州。交趾入寇。容提兵討平之。後隱於建昌麻姑山。自號雲壑老人。同上

董槐、字庭植、濠州定遠人。淳祐六年。權廣西運判。兼提點刑獄。至邕州。上守禦七策。邕州西通諸蠻夷。南引交趾及符奴月烏流鱗之屬。數寇邊。槐與約無相侵。推赤心遇之。皆伏不動。又與交趾約五事。一無犯邊。二歸我侵地。三還擄掠生口。四奉正朔。五通貿易。于是遣使來獻方物。大象。南方悉定。九年召赴闕。宋史董槐傳

黃鼐、知邕州。建學育才。鼎新州治。有化民成俗之效。人咸德之。粵西文載

馬陜、岩昌人也。一家父子兄弟。皆以忠勇爲名將。而陜與其兄塋特顯。咸淳中。陜知欽州。徙知邕州。邕地接六詔安南。旁通諸谿峒。撫御少失宜。往往召亂。陜鎮撫諸蠻。及治關隘。皆有條理。大理不敢越。善闡安南不敢入。永平諸峒皆上帳州。邊陲晏然。未幾以左武衛將軍徵入朝。己而宋亡。陜因留靜江。總屯戍諸軍。護經略司印守城。至元十四年。平章阿里海牙攻廣西。陜發所部及諸峒兵守靜江。而自將三千人守嚴關。鑿馬坑。斷嶺道之兵。敵攻嚴關不克。乃以偏師入平樂。過臨桂。夾攻陜。陜敗退。保靜江。平章使人招降。陜發弩射之。攻三月。陜夜不解甲。前後百餘戰。城中死傷相藉。訖無降意。城東隅稍卑。敵軍陽攻西門。以精兵夜決水牖。攻東門。破其外城。陜閉內城守。又破之。陜南死士巷戰。刀傷臂。被執殺之。斷其首。猶握拳奮起立。踰時始仆。靜江破。邕守馬成旺。及其子都統應麒以城降。獨陜部將婁鈐轄。猶以二百五十人守月城不下。阿里海牙笑曰。是何足攻。圍之十餘日。婁從壁上呼曰。吾屬饑不能出降。苟賜之食。當聽命。乃遣之牛數頭。米數斛。一部將開門取歸。復閉壁。敵軍乘高視之。兵皆分米炊。未熟。生嚮牛啖

立盡。鳴角伐鼓。諸將以爲出戰也。甲以待。妻乃命所部人。擁一火炮然之。聲如雷霆震城。城皆崩。煙氣漲天。外兵多驚死者。火熄入視之。灰燼無遺矣。宋史馬堅傳

(元)

烏古孫澤、字潤雨、臨潢人。至元二十九年。授廣南西道宣慰副使。秋七月。併左右两道。歸廣西宣慰司。置元帥府。澤爲廣西兩江道宣慰副使。僉都元帥府事。兩江荒遠。不知禮法。澤作司規三十有二章。以漸爲教。其民至今遵守之。又省廩置二十二所。以紓民力。歲飢。上言蠲其田租。發象州賀州官粟三千五百石。以賑饑者。既發。乃上其事。時行省平章哈喇哈孫。察其心誠愛民。不以專擅罪之。邕管數被寇。澤循行並徼得阨塞處。布畫遠邇。募民伉健者四千六百餘戶。置雷留那扶十屯。列營堡以守之。陂水墾田。築八塌以節瀦洩。得稻田若干畝。歲收穀若干石。爲軍儲。邊民賴之。元史烏古孫澤傳

臧夢解、慶元人。至元三十年。爲廣西肅政廉訪副使。行部至邕。平反邕州黃震被誣贓罪。

元史臧夢解傳

封履孫、字道坦、容州人。舉天歷三年進士。初授藤縣學止。遷知邕州。時內地雲擾。履孫

莅政嚴明。民獲安堵。粵西文載